

L I G J

PROJEKT

NR _____ DATË ____ / ____ / 2018

PËR

SKEMAT E CILËSISË SË PRODUKTEVE BUJQËSORE DHE USHQIMORE¹

Në mbështetje të neneve 78, dhe 83 pika 1 të Kushtetutës, me propozim të Këshillit të Ministrave,

KUVENDI I REPUBLIKËS SË SHQIPËRISË

V E N D O S I:

KREU I DISPOZITA TË PËRGJITHSHME

Neni 1 Qëllimi

Ky ligj ka për qëllim të përcaktojë:

1. Rregullat për funksionimin e sistemit të cilësisë së produkteve bujqësore dhe ushqimore, për të siguruar:

- konkurrencë të drejtë për fermerët dhe prodhuesit e produkteve bujqësore dhe ushqimore me karakteristika dhe tregues të vlerës së shtuar të cilësisë;
- informacionin e nevojshëm për konsumatorin për cilësinë e këtyre produkteve.

2. Detyrat dhe kompetencat e organeve përgjegjëse për:

- vlerësimin e aplikimeve për regjistrimin e emërtimit "Specialitet Tradicional i Garantuar";
- verifikimin e përputhshmërisë me specifikimet e produktit për kërkesat për regjistrim të emërtimeve të origjinës dhe të treguesve gjeografikë për produktet bujqësore dhe ushqimore, siç përcaktohet në pikën 5, shkronja "a", të nenit 178 të ligjit nr. 9947, datë 7.7.2008 "Për pronësinë industriale";
- inspektimin dhe certifikimin e produkteve bujqësore dhe ushqimore të regjistruara si STG, EOM dhe TGJM, para vendosjes së tyre në treg.

¹ Ky ligj është përafëruar pjesërisht me Rregulloren e Këshillit (KE) nr. 1151/2012, të parlamentit dhe këshillit europian të datës 21 Nëntor 2012 për skemat e cilësisë për produktet bujqësore dhe ushqimore, të ndryshuar. Numri CELEX: 32012R1151; Fletorja Zyrtare e Bashkimit Europian, Seria L Nr. 343, dt. 14.12.2012, faqe 1-23.

- kryerjen e kontrolleve zyrtare për të verifikuar përputhshmërinë e produkteve bujqësore dhe ushqimore të regjistruara si STG, EOM dhe TGJM me kërkesat e përcaktuara në këtë ligj.

Neni 2 Fusha e zbatimit

Ky ligj zbatohet për produkte bujqësore dhe ushqimore për konsum njerëzor, të përcaktuara sipas listës të miratuar me urdhër të Ministri.

Neni 3 Përkufizime

Në këtë ligj termat e mëposhtëm kanë këto kuptime:

- a) "Emërtim origjine", ka kuptimin e dhënë në legjislacionin në fuqi për pronësinë industriale.
- b) "Grup", ka kuptimin e dhënë në legjislacionin në fuqi për pronësinë industriale.
- c) "Karakter specifik", janë karakteristikat e veçanta të prodhimit që e dallojnë qartë një produkt nga produktet e tjera të ngjashme të së njëjtës kategori.
- d) "Ministria", është ministria përgjegjëse për bujqësinë.
- e) "Ministri", është Ministri përgjegjës për bujqësinë.
- f) "Operator ushqimor", ka kuptimin e dhënë në legjislacionin në fuqi për ushqimin.
- g) "Tradicionale", është përdorimi i provuar i një produkti në tregun e brendshëm për një periudhë kohe që lejon transmetim ndërmjet brezave, e cila të jetë të paktën 30 vjet.
- h) "Tregues gjeografik", ka kuptimin e dhënë në legjislacionin në fuqi për pronësinë industriale.
- i) "EO", është shkurtimi i shprehjes emërtim origjine.
- j) "EOM", është shkurtimi i shprehjes emërtim origjine i mbrojtur.
- k) "STG", është shkurtimi i shprehjes specialitet tradicional të garantuar.
- l) "TGJ", është shkurtimi i shprehjes tregues gjeografik.
- m) "TGJM", është shkurtimi i shprehjes tregues gjeografik i mbrojtur.

KREU II

ORGANET PËRGJEGJESE PËR REGJISTRIMIN E STG DHE VLERËSIMIN E EOM DHE TGJM

Neni 4 Organet përgjegjëse

1. Ministria është Autoriteti Kompetent për skemat e cilësisë së produkteve bujqësore dhe ushqimore.
2. Në ministri ngrihet dhe funksionon Komisioni për Skemat e Cilësisë (KSC), për vlerësimin e aplikimeve për emërtimin STG, EO, TGJ. Komisioni kryen vlerësimin për:
 - a) aplikimet për regjistrim të emërtimit STG;
 - b) aplikimet për ndryshimin e specifikimeve të produktit me emërtimin STG;

- c) kundërshtimet e aplikimeve për regjistrim për emërtimin STG, EOM, TGJM;
- d) përputhshmërinë me specifikimet e produktit për kërkesat për regjistrim të EO dhe TGJ për produktet bujqësore dhe ushqimore.
- e) kundërshtimet e ndërsjellta në BE.

3. Struktura përgjegjëse për skemat e cilësisë (më poshtë struktura përgjegjëse) në Ministri kryen:

- a) marrjen dhe shqyrtimin e formaliteteve të kërkesave për regjistrim të emërtimit STG dhe marrjen e kërkesave për vlerësimin e përputhshmërisë me specifikimet e produktit për regjistrim të EO dhe TGJ.

- b) Paraqitjen e aplikimit tek Komisioni Evropian, me kërkesë të grupit, për regjistrim në BE, të produkteve të regjistruara si STG në Shqipëri.

- c) kryerjen e procedurës në rastin e paraqitjes së ndonjë kundërshtimi nga një vend tjetër në lidhje me produktet shqiptare që aplikojnë për regjistrim në BE, të emërtimit STG.

- d) kryerjen e procedurës në rastin e paraqitjes së kundërshtimit nga Republika e Shqipërisë për aplikimet për regjistrimin e emertimit STG të paraqitur nga një vend tjetër;

Neni 5

Komisioni për skemat e cilësisë

1. Komisioni për skemat e cilësisë (**KSC**), përbëhet nga 7 anëtarë si më poshtë dhe kryesohet nga përfaqësuesi i ministrisë:

- dy përfaqësues nga Ministria;

- Pesë ekspertë nga fusha akademike, institucionet kërkimore shkencore apo të pavarur, me njohuri të gjëra mbi çështjet që lidhen me STG, TGJ, EO, me profesione si: specialist kulinarie, etnografi/histori, teknologji ushqimore dhe agronomi.

2. Anëtarët e Komisionit emërohen dhe shkarkohen me Urdhër të Ministrit dhe zgjidhen bazuar në arsimin, profesionin dhe eksperiencën e cila duhet të jetë të paktën 10 vjecare në profesion.

3. Pagesa e komisionit bëhet sipas legjislacionit përkatës në fuqi.

4. Përbërja, funksionimi, organizimi dhe detyrat e Komisionit përcaktohen me vendim të Këshillit të Ministrave, me propozimin e ministrit.

KREU III

EMËRTIMI SPECIALITET TRADICIONAL I GARANTUAR

Neni 6

Kriteret e regjistrimit

1. Një emër regjistrohet si STG, nëse përshkruan një produkt bujqësor ose ushqimor të veçantë që:

- a) përfitohet nga një metodë prodhimi, përpunimi apo ka një përbërje, e cila korrespondon me praktikën tradicionale për këtë produkt bujqësor ose ushqimor;

- b) është prodhuar nga lëndë të para ose përbërës që janë përdorur tradicionalisht.

2. Një emër që të regjistrohet si STG duhet të:
 - a) jetë përdorur tradicionalisht për t'iu referuar produktit të veçantë;
 - b) identifikojë karakterin tradicional apo të veçantë të produktit.
3. Një emër nuk mund të regjistrohet nëse i referohet vetëm termave të përgjithshëm që përdoren për një grup produktesh, ose termave të parashikuara nga një legjislacion i veçantë.

Neni 7

E drejta për të paraqitur një aplikim

1. Kërkesa për regjistrimin e emrave si STG, mund të paraqitet vetëm nga një grup që punon me produktet, emrat e të cilave do të regjistrohen.
2. Një person i vetëm fizik ose juridik mund të trajtohet si një grup, kur tregohet se personi në fjalë është i vetmi prodhues që dëshiron të paraqesë një kërkesë.

KREU IV

PROCEDURAT PËR REGJISTRIMIN E EMËRTIMIT STG

Neni 8

Paraqitja dhe përbërja e aplikimit

1. Aplikimi për regjistrimin e një emërtimi STG paraqitet në Ministri.
2. Aplikimi për regjistrimin e emërtimit STG bëhet vetëm për një emërtim STG dhe vetëm për një produkt bujqësor ose ushqimor.
3. Aplikimi përfshin:
 - a) emrin dhe adresën e grupit të prodhuesve, ose personit që vepron në emër të grupit;
 - b) specifikimet e produktit që përfshijnë:
 - i. emrin që do të regjistrohet si emërtim STG ashtu siç përdoret në treg ose në gjuhën e zakonshme;
 - ii. një përshkrim të produktit, përfshirë karakteristikat kryesore të tij fizike, kimike, mikrobiologjike apo organoleptike, që tregojnë karakterin e veçantë të produktit;
 - iii. një përshkrim të metodës së prodhimit, që prodhuesit duhet të ndjekin duke përfshirë, kur është e përshtatshme, natyrën dhe karakteristikat e lëndëve të para ose përbërësve të përdorur ose mënyrën e veçantë të prodhimit të tyre.
 - iv. vetitë kryesore që krijojnë karakterin tradicional të produktit;
 - c) kategorinë e produktit bujqësor ose ushqimor;
 - d) informacionin mbi procedurën dhe shpeshësinë e kontrollit për përputhshmërinë e produktit me specifikimet;
 - e) një përmbledhje të specifikimeve të produktit, në veçanti të dhënat e përcaktuara në pikat 3, shkronja “b”, i- iv të këtij neni;
 - f) listën e dokumenteve të paraqitura së bashku me aplikimin për regjistrim;
 - g) dokumentin që konfirmon pagesën e tarifës për regjistrim.

Neni 9

Verifikimi i formaliteteve

1. Struktura përgjegjëse, verifikon nëse aplikimi është në përputhje me kërkesat formale të përcaktuara në nenin 8, të këtij ligji. Verifikimi kryhet brenda 5 ditë pune nga marrja e tij.
2. Nëse aplikimi për regjistrim i plotëson kërkesat formale, ministria e publikon atë siç përcaktohet në nenin 10, shkronja “c”, të këtij ligji.
3. Nëse kërkesa për regjistrim nuk i plotëson kërkesat formale, aplikuesit i kërkohet të plotësojë mangësitë brenda 10 ditë pune nga marrja e njoftimit.
4. Nëse mangësitë nuk plotësohen brenda afatit, aplikimi për regjistrim i refuzohet dhe njoftohet aplikanti.

Neni 10

Notifikimi dhe publikimi

1. Në rastin kur aplikimi plotëson kërkesat formale sic përcaktohet në nenin 9 pika 2, të këtij ligji, struktura përgjegjëse në Ministri, duhet të:
 - a) njoftojë aplikantin që aplikimi plotëson kërkesat formale;
 - b) paraqesë aplikimin tek Komisioni për vlerësim;
 - c) publikojë të dhënat për pranimin e aplikimit për regjistrim në Buletinin dhe në faqen e internetit të ministrisë.
2. Të dhënat që publikohen në buletin përmbajnë:
 - a) datën e paraqitjes së aplikimit;
 - b) përmbledhjen e specifikimeve të përcaktuara në nenin 8, pika 3, shkronja “e”.

Neni 11

Procedura e kundërshtimit

1. Çdo person fizik ose juridik që ka një interes të ligjshëm, mund të paraqesë në Ministri, një kundërshtim ndaj aplikimit për regjistrim me emërtimin STG, brenda 20 ditë pune nga dita e publikimit, kundrejt pagesës së tarifës përkatëse.
2. Kundërshtimi përmban:
 - a) emrin dhe adresën e personit që paraqet kundërshtimin;
 - b) të dhëna që justifikojnë interesin ekonomik ose juridik të personit që paraqet kundërshtimin.
3. Struktura përgjegjëse verifikon nëse kundërshtimi është në përputhje me kërkesat e përcaktuara në pikat 1 dhe 2 të këtij neni. Verifikimi kryhet brenda 5 ditë pune nga marrja e tij.
4. Nëse kërkesat e përcaktuara në pikat 1 dhe 2 të këtij neni nuk plotësohen, struktura përgjegjëse refuzon kërkesën për kundërshtim dhe njofton paraqitësin e kundërshtimit.

5. Nëse kërkesat e përcaktuara në pikat 1 dhe 2 të këtij neni plotësohen, struktura përgjegjëse njofton aplikantin që ka paraqitur kërkesën për regjistrim dhe i jep atij mundësinë të paraqesë vërejtje, shpjegime ose dokumenta shtesë brenda 10 ditë pune nga data e njoftimit.

Neni 12 Vendimet e komisionit

1. Nëse kundërshtimi në lidhje me aplikimin për regjistrim nuk është paraqitur brenda 20 ditë pune nga data e afatit për dorëzimin e një kundërshtimi, Komisioni merr vendim për aplikimin lidhur me përmbushjen ose jo të kërkesave të përcaktuara në nenin 8, pika 3, shkronja “b” të këtij ligji, brenda 20 ditë pune, i cili i dërgohet për miratim ministrit.

2. Nëse kundërshtimi në lidhje me aplikimin për regjistrim është paraqitur, brenda 20 ditë pune nga data e afatit për dorëzimin e kundërshtimit, Komisioni shqyrton dhe merr vendim brenda 25 ditë pune, mbi ligjshmërinë ose jo të kundërshtimit të depozituar, lidhur me plotësimin e kërkesave të aplikimit të përcaktuara në nenin 8, pika 3, shkronja “b” të këtij ligji.

3. Nëse aplikimi për regjistrim dhe kundërshtimi janë të justifikuar, struktura përgjegjëse, thërret për konsultim aplikuesin dhe kundërshtuesin, që brenda një kohë të caktuar, të bien dakort ose jo për aplikimin. Kur palët bien dakort aplikimi i rishikuar paraqitet për regjistrim si aplikim i përbashkët, ndërsa kur nuk bien dakort aplikimi refuzohet me urdhër të ministrit.

4. Vendimi i refuzimit të aplikimit për regjistrim mund të ankimohej në gjykatën kompetente, brenda 20 ditë pune nga data e marrjes së njoftimit.

Neni 13 Ndryshimi i specifikimeve

Dispozitat e përcaktuara nga neni 8 deri në nenin 12 zbatohen edhe për aplikimin për ndryshimin e specifikimeve.

Neni 14 Tarifat

Tarifat e shërbimeve për regjistrimin e STG, sipas nenit 8, pika 3, shkronja “g” dhe të kundërshtimeve sipas pikës 1 të nenit 11, të këtij ligji, paguhen nga aplikanti dhe përcaktohen me udhëzim të përbashkët të Ministrit dhe ministrit përgjegjës për financat.

KREU V MBROJTJA KOMBËTARE DHE LOGOJA

Neni 15

Mbrojtja Kombëtare

1. Emertimet STG quhen të mbrojtura me marrjen e vendimit për regjistrim dhe regjistrimin në regjistër.
2. Struktura përgjegjëse mban regjistrin e përditësuar të emrave të miratuar si STG, i cili është publik.
3. Forma dhe përmbajtja e regjistrit miratohet me udhëzim të ministrit.

Neni 16

Përdorimi i emërimit dhe logos STG

1. Emri i regjistruar si STG, mund të përdoret nga çdo operator ushqimor që vendos në treg një produkt bujqësor ose ushqimor që është në përputhje me specifikimet përkatëse të përcaktuara në këtë ligj.
2. Çdo produkt bujqësor ose ushqimor i certifikuar për përputhshmërinë me specifikimet për emertimin STG në përputhje me kërkesat e këtij ligji, duhet të etiketohet me shprehjen “Specialitet Tradicional i Garantuar” dhe logon STG.
3. Logoja STG duhet të përmbajë elementë të trashëgimisë kulinare dhe traditës së produkteve bujqësore dhe ushqimore shqiptare.
4. Logoja kombëtare për produktet STG përcaktohet me vendim të Këshillit të Ministrave.

Neni 17

Qëllimi i Mbrojtjes

Emrat e regjistruar si STG duhet të mbrohen nga çdo keqpërdorim, imitim, apo çdo praktike tjetër që keqinformon konsumatorin të tilla si:

- a) përdorimi i këtyre emrave për produkte që nuk janë të certifikuara si STG edhe nëse ky përdorim nuk ka qëllim të tregojë që janë STG;
- b) përdorimi i emrave të mbrojtur të shprehur me fjalë të ngjashme të përkthyer nga origjinali apo të shoqëruar me shprehje "stil", "tip", "metodë", "prodhuar si", "imitim";
- c) përdorimi i treguesve, shenjave ose simbole që keqinformojnë konsumatorin për vendin e origjinës, natyrën ose cilësitë thelbësore të produktit, në ambalazhim ose dokumentet që shoqërojnë produktin në fjalë.

KREU VI

PROCEDURA NË RAST KUNDËRSHTIMIT TË NDËRSJELLTE TË APLIKIMIT NË BE

Neni 18

Kundërshtimi ndaj aplikimit të paraqitur nga një vend tjetër në BE

1. Çdo person fizik ose juridik shqiptar, që ka një interes ligjor për të paraqitur një kundërshtim lidhur me kërkesën për regjistrim të emërimit STG ose ndryshim të specifikimeve për emërtimin STG, për produktet bujqësore ose ushqimore në përputhje me legjislacionin evropian për skemat e cilësisë, njofton Ministrinë me shkrim brenda 2 muajve nga data e publikimit në Gazetën Zyrtare të Bashkimit Evropian.
2. Njoftimi i kundërshtimit duhet të përmbajë një justifikim të përgjithshëm që aplikimi për regjistrim të emërimit STG ose ndryshim të specifikimeve për emërtimin STG, mund të çënojë kushtet e përcaktuara në legjislacionin evropian. Struktura përgjegjëse njofton menjëherë Komisionin Evropian për kundërshtimin e paraqitur.
3. Në rast të paraqitjes së njoftimit të kundërshtimit sipas pikës 2 të këtij neni, kundërshtuesi duhet t'ë paraqesë në Ministri me shkrim deklaratën e arsyetuar të kundërshtimit.
4. Komisioni merr vendim për pranueshmërinë ose jo të deklaratës së arsyetuar të kundërshtimit, i cili i dërgohet ministrit për miratim.

Neni 19

Paraqitja e aplikimit për regjistrim në BE nga Shqipëria

1. Çdo grup që ka regjistruar në Shqipëri, një produkt bujqësor ose ushqimor si STG, mund të paraqesë kërkesë për regjistrim të këtij produkti në BE.
2. Kërkesa depozitohet në ministri dhe duhet të jetë në një nga gjuhët zyrtare të BE-së, sipas formatit të përcaktuar.
3. Struktura përgjegjëse njofton menjëherë aplikuesin për marrjen nga komisioni evropian të:
 - a) njoftimit për kundërshtim;
 - b) deklaratës së arsyetuar për kundërshtimin;të paraqitura nga një vend tjetër.
4. Aplikanti brenda 20 ditë pune nga data e marrjes së njoftimit, duhet të paraqesë me shkrim në Ministri, qëndrimin e tij për kundërshtimin dhe të deklaratës së arsyetuar të kundërshtimit.
5. Për deklaratën e arsyetuar të kundërshtimit të parashtruar nga një vend tjetër, komisioni merr vendim për pranueshmërinë ose jo të deklaratës së arsyetuar të kundërshtimit, i cili i dërgohet ministrit për miratim.

6. Kur aplikimi për regjistrim dhe kundërshtimi janë të justifikuara, struktura përgjegjëse i paraqet vendit që ka paraqitur kundërshtimin, propozimin në lidhje me kundërshtimin, të dakortësuar me parë me aplikantin që ka paraqitur kërkesën për regjistrim në BE, si dhe masat e propozuara për të arritur një marrëveshje.
7. Struktura përgjegjëse, pas paraqitjes së këtij propozimi, ndërmerr hapat për të arritur një marrëveshje dhe informon Komisionin Evropian, për arritjen ose jo të marrëveshjes.
8. Formati i aplikimit dhe i kundërshtimit përcaktohet me urdhër ministri.

Kreu VII

VLERËSIMI I SPECIFIKIMEVE PËR EOM DHE TGJM

Neni 20

Dorëzimi i aplikimeve për EOM dhe TGJM në Komision

Struktura përgjegjëse, mbas marrjes së aplikimit për regjistrim të EOM ose TGJM, nga Drejtoria e Përgjithshme e Pronësisë Industriale (DPPI), lidhur me produktet bujqësore dhe ushqimore, e dërgon atë tek Komisioni brenda 4 ditë pune.

Neni 21

Vendimi i komisionit

1. Komisioni brenda 14 ditë pune nga marrja e dosjes nga struktura përgjegjëse, shqyrton dhe merr vendimin për aplikimet për EOM dhe TGJM, nëse ato përmbushin kërkesat e përcaktuara në nenin 176 të Ligjit nr. 9947, datë 07/07/2008, amenduar, “Për Pronësinë Industriale”, si dhe referuar kompetencave të specifikuara në pikat 1 dhe 3 të nenit 182/c të tij. Vendimi i dërgohet ministrit për miratim dhe pas miratimit i dërgohet DPPI.
2. Në rast të paraqitjes së kundërshtimit në lidhje me aplikimin për regjistrimin e EOM dhe TGJM, Komisioni brenda 14 ditë pune nga marrja e kundërshtimit nga DPPI, shqyrton dhe merr vendim për përmbushjen e kërkesave të përcaktuara në nenin 176 të Ligjit nr. 9947, datë 07/07/2008, amenduar, “Për Pronësinë Industriale” duke iu referuar kompetencave të specifikuara në pikën 7 të nenit 182/ç të këtij ligji. Vendimi i dërgohet ministrit për miratim dhe pas miratimit i dërgohet DPPI.

KREU VIII

VERIFIKIMI I PERPUTHSHMËRISËE ME SPECIFIKIMET E PRODUKTIT PËR STG, EOM, TGJM DHE KONTROLLET ZYRTARE

Neni 22

Autoritetet për verifikimin e përputhshmërisë

1. Autoritetet kompetente për kryerjen e inspektimeve dhe certifikimin për përputhshmërinë e produkteve bujqësore dhe ushqimore të regjistruara si STG, EOM dhe TGJM me specifikimet përkatëse, para vendosjes së tyre në treg janë:
 - a) Autoriteti Kombëtar i Ushqimit (AKU);
 - b) Trupat certifikuese, të miratuara.
2. AKU, për kryerjen e inspektimeve dhe certifikimin për përputhshmërinë e produkteve bujqësore dhe ushqimore të regjistruara si STG, EOM dhe TGJM me specifikimet përkatëse, duhet të ketë personel me kualifikimin dhe përvojën e duhur si dhe pajisjet dhe infrastrukturën e duhur.
3. Trupat certifikuese miratohen nga Komisioni për Miratimin e Trupave Certifikuese.
4. AKU, është autoriteti përgjegjës për mbikëqyrjen e aktivitetit të trupave të certifikimit të miratuara.
5. Kontrolli për verifikimin e përputhshmërisë me specifikimet e produktit sipas kërkesave të këtij ligji, kryhet në përputhje me parimet e përgjithshme të kontrollit zyrtar të përcaktuara në legjislacionin në fuqi për ushqimin dhe të inspektimet.

Neni 23 **Trupat certifikuese**

1. Trupat certifikuese kryejnë inspektimin dhe certifikimin e produkteve bujqësore dhe ushqimore, në përputhje me kërkesat e përcaktuara në këtë ligj.
2. Trupa certifikuese miratohet nëse plotëson kriteret e përgjithshme si më poshtë:
 - a) të jetë i akredituar në përputhje me standardin ISO 17065:2012;
 - b) ofron garanci të mjaftueshme lidhur me objektivitetin, paanshmërinë dhe efektivitetin e kryerjes së detyrave.
3. Trupa certifikuese i paraqet rregullisht AKU rezultatet e kontrolleve të kryera dhe sa herë që i kërkohet.
4. Kriteret e hollësishme për miratimin e trupave certifikuese përcaktohen me vendim të Këshillit të Ministrave.

Neni 24 **Miratimi i trupave certifikuese**

1. Në ministri ngrihet dhe funksionon Komisioni për Miratimin e Trupave Certifikuese (KMTC), i përbërë nga pesë anëtar i cili kryesohet nga zëvendësministri i ministrisë.
2. Trupa certifikuese pas miratimit pajiset me numër identifikues.
3. Përbërja, funksionimi, organizimi dhe detyrat e KMTC, përcaktohen me vendim të Këshillit të Ministrave, me propozim të ministrit.

Neni 25

Mbikëqyrja e Trupave certifikuese

1. AKU është përgjegjës për mbikëqyrjen e aktivitetit të trupave certifikuese.
2. Gjatë mbikëqyrjes AKU kontrollon:
 - a) nëse trupa e kontrollit zbaton procedurat e kontrollit;
 - a) nëse ka personel të kualifikuar dhe të mjaftueshëm, si dhe pajisjet e infrastrukturën e duhur për të kryer këto kontrolle;
 - b) dokumentacionin e kontrolleve të kryera ndaj operatorëve të produkteve bujqësore ose ushqimore që prodhojnë produkte me emërtimet STG, EOM dheTGJM;
 - c) të dhënat e përfuara nga kontrolli i përputhshmërisë së produkteve bujqësore dhe ushqimore me emertimet STG, EOM dheTGJM me specifikimet e tyre.
3. Pas kontrollit të kryer, AKU informon trupën e çertifikimit për konkluzionet dhe veprimet e duhura korrigjuese që duhet të ndërmerret, nëse është e nevojshme.
4. Çdo vit, AKU miraton planin e kontrollit të trupave certifikuese për përputhshmërinë e produkteve bujqësore dhe ushqimore me emërtime STG, EOM dheTGJM me specifikimet e tyre.
5. Trupat certifikuese i lejojnë AKU si autoritet mbikëqyrës, hyrjen në zyrat dhe ambientet e tyre dhe i sigurojnë çfarëdolloj informacioni dhe ndihme që konsiderohet e nevojshme.

Neni 26

Verifikimi i përputhshmërisë

1. Verifikimi i përputhshmërisë së produkteve bujqësore dhe ushqimore të regjistruara me emertimet STG, EOM dhe TGJM me specifikimet e tyre, bëhet me kërkesë të operatorit ushqimor.
2. Operatori zgjedh nëse verifikimi i përputhshmërisë do të kryhet nga AKU apo një trup certifikuese e miratuar. Shpenzimet e kontrollit për verifikimin e përputhshmërisë përballohen nga prodhuesi.
3. Nëse verifikimi i përputhshmërisë kryhet nga AKU, tarifat e shërbimit përcaktohen me udhëzim të përbashkët të Ministrit dhe ministrit përgjegjës për financat.
4. Nëse pas përfundimit të verifikimit të përputhshmërisë sipas kërkesave të këtij ligji, rezulton që produkti është në përputhje me specifikimet, AKU ose trupa certifikuese, lëshon çertifikatën e cilësisë që konfirmon përputhshmërinë e produkteve bujqësore apo ushqimore me specifikimet.
5. Forma dhe përmbajtja e certifikatës së cilësisë që konfirmon përputhshmërinë e produktit bujqësor dhe ushqimor me specifikimet, përcaktohet me urdhër të Ministrit.

Neni 27

Kontrollet zyrtare

1. Autoriteti Kombëtar i Ushqimit është autoriteti kompetent përgjegjës për kryerjen e kontrolleve zyrtare për të verifikuar përputhshmërinë e produkteve bujqësore dhe ushqimore të regjistruara si STG, EOM dhe TGJM me kërkesat e përcaktuara në këtë ligj.
2. Kontrollet zyrtare përfshijnë:
 - a) verifikimin që një produkt është në përputhje me specifikimet për STG, EOM dhe TGJM;
 - b) monitorimin e përdorimit në treg të emrave të mbrojtur, si STG në përputhje me nenin 16 të këtij ligji dhe EOM, TGJM në përputhje me nenin 178 të Ligjit nr. 9947, datë 07/07/2008, “Për Pronësinë Industriale”, për produktet bujqësore dhe ushqimore;
 - c) Kontrollin dhe monitorimin e produkteve bujqësore ose ushqimore të importuara që tregtohen me emërtime STG, EOM, TGJM.
3. Të gjithë operatorët që prodhojnë, ruajnë ose vendosin në treg një produkt me emërtimet STG, EOM, TGJM, janë objekt i kontrolleve zyrtare.
4. AKU duhet të përfshijë në planin vjetor ose shumëvjetor të kontrollit edhe kontrollin e produkteve me emërtimet STG, TGJM dhe EOM.
5. Kontrollet zyrtare për kontrollin e produkteve me emërtimet STG, TGJM dhe EOM, kryhen bazuar në analizën e riskut.

Neni 28

Raportimi vjetor

1. Çdo trup certifikuese e miratuar i dërgon AKU deri më 31 janar të çdo viti:
 - a) raportin e inspektimeve të kryera në vitin e kaluar;
 - b) listën e operatorëve të kontrolluar, duke përfshirë:
 - i. emrin dhe adresën e operatorit;
 - ii. llojin e produktit bujqësor ose ushqimor;
 - iii. sasinë e prodhimit për vitin e mëparshëm;
 - c) informacione lidhur me procedurat e kontrollit.
2. Raporti paraqitet sipas formatit të përcaktuar nga AKU, në formë shkresore dhe elektronike.
3. AKU i dërgon strukturës përgjegjëse në Ministri, deri me 31 Mars të çdo viti, raportin përmbledhës mbi kontrollet për certifikimin e produkteve bujqësore ose ushqimore, të kryera nga AKU ose trupat certifikuese të miratuara.

Neni 29

Procedurat në rastin e parregullsive

Në rast se gjatë inspektimit rezulton se produkti bujqësor ose ushqimor i certifikuar, nuk vazhdon ti përmbush specifikimet për STG të përcaktuara në nenin 4, të këtij ligji dhe nenin 176 të ligjit

nr. 9947, datë 07/07/2008, "Për Pronësinë Industriale" i ndryshuar, për të cilin është certifikuar, AKU ose trupi certifikues i kërkon operatorit plotësimin e parregullsive brenda një afati të caktuar.

KREU IX
SKEMA TË TJERA CILËSIE
Neni 30
Të përgjithshme

1. Skema të tjera Cilësie do të konsiderohen të gjitha skemat që nuk janë STG, EOM dhe TGJM. Produktet bujqësore dhe ushqimore për të cilat karakteristika të veçanta të prodhimit ose të cilësisë, vijnë nga:

- përdorimi i metodave tradicionale të prodhimit, të paktën 30 vjet;
- janë pjesë e trashëgimisë kulturore të rajonit në të cilin janë prodhuar;
- janë pjesë e identitetit të komunitetit lokal;

mund të konsiderohen pjesë e skemave të tjera të cilësisë.

2. Ministria përcakton, me Udhëzim të Ministrit, përkufizimet, procedurat për rregjistrim, format e aplikimit, organet përgjegjëse, organet e kontrollit, mënyrën e promovimit, si dhe logot përkatëse për Skemat e Tjera të Cilësisë.

3. Kërkesa nga prodhuesit e produkteve bujqësore dhe ushqimore, për këto skema do të paraqitet në Ministri.

Neni 31
Komiteti

1. Në Ministri do të krijohet "Komiteti", si një trup konsultimi dhe këshillimi për Ministrin, për dhënien e mendimeve dhe vlerësimeve për produktet bujqësore dhe ushqimore që do të jenë pjesë e Skemave të tjera të Cilësisë.

2. Komiteti përbëhet nga 11 anëtarë, nga të cilët kryetari përfaqësues i Ministrisë dhe anëtarët ekspertë me njohuri të gjera mbi çështjet që lidhen me cilësinë e ushqimit.

3. Rregullorja e funksionimit të Komitetit, detyrat, kërkesat, kriteret, afatet, kriteret e emërimit dhe shkarkimit të anëtarëve, përcaktohen me urdhër Ministri.

4. Anëtarët e Komitetit do të paguhën për pjesëmarrje në mbledhjet e Komitetit, sipas tarifave të përcaktuara në aktet ligjore e nënligjore përkatëse.

Neni 32
Mbrojtja kombëtare

1. "Skemat e tjera të Cilësisë" do të jenë subjekt i mbrojtjes në territorin e Republikës së Shqipërisë, në vijim referuar si "mbrojtje kombëtare".

2. Rregjistri i produkteve bujqësore dhe ushqimore nën mbrojtjen kombëtare do të mbahet nga struktura përgjegjëse në Ministri dhe do të jetë publik.

3. Verifikimi i përputhshmërisë së produktit bujqësor apo ushqimor me kriteret e përcaktuara, referuar nenit 30, pika 3 të këtij ligji, do të bëhet përpara vendosjes së produktit në treg, nga Autoritetit Kombëtar i Ushqimit.

4. Tarifa e shërbimit do të paguhet nga operatori i biznesit ushqimor

Neni 33

E drejta e përdorimit

Operatori i biznesit ushqimor që prodhon një produkt bujqësor ose ushqimor në përputhje me kërkesat dhe kriteret e aprovuara, i cili ka hyrë në rregjistrin e përmendur në nenin 32, pika 2, të këtij ligji, ka të drejtë të përdorë në treg "Logon" duke e vendosur atë në produktin e tij bujqësor ose ushqimor, ose në ambalazhin e tij.

KREU X

KUNDËRVAJTJET ADMINISTRATIVE DHE MASAT

Neni 34

Kundërvajtjet

1. Shkeljet e dispozitave të këtij ligji, kur nuk përbëjnë vepër penale, përbëjnë kundërvajtje administrative.
2. Çdo operator që vendos në treg produkte bujqësore ose ushqimore, me emrat e regjistruar si STG, TGJM, EOM, simbolet, frazat ose shkurtesat e tyre, të cilat nuk përmbushin specifikimet e përcaktuara në nenin 4, të këtij ligji dhe nenin 176 të ligjit për pronësinë industriale, ndëshkohet me gjobë nga inspektori i AKU nga 50 000 lekë deri në 100 000 lekë.
3. Nëse operatori nuk plotëson brenda afatit të caktuar parregullsitë sipas përcaktimeve të nenit 29, të këtij ligji, AKU ose trupi certifikues i heq certifikatën operatorit dhe:
 - a) ndalon përdorimin e emërtimeve STG, EOM, ose TGJM, përdorimin e simboleve të tyre apo shprehjeve, shkurtesave në shqip apo anglisht STG, PDO, ose PGI;
 - b) ndalon vendosjen e produktit bujqësor ose ushqimor në treg;
 - c) kërkon tërheqjen e produktit bujqësor ose ushqimor nëse është vendosur në treg.
4. Nëse gjatë mbikqyrjes AKU konstaton që trupa certifikuese nuk vazhdon të përmbushë kriteret e miratimit, të përcaktuara në pikën 2 dhe 4, të nenit 23 të këtij ligji, ajo i propozon Ministrin heqjen e miratimit.

Neni 35

Ankimi

1. Kundër vendimit të inspektorit sipas pikës 2, të nenit 30, të këtij ligji, mund të bëhet ankimi në përputhje me ligjin për inspektimin.
2. Kundër masave të përcaktuara në pikën 3 dhe 4 të nenit 30, të këtij ligji, mund të bëhet ankimi me shkrim tek Ministri, brenda 10 ditëve nga data e marrjes dijeni për masën e vendosur.
3. Ministri duhet t'i përgjigjet ankimit brenda 15 ditëve nga data e paraqitjes së ankimit.

4. Ekzekutimi i vendimit bëhet sipas procedurave të përcaktuara në ligjin për kundërvajtjet administrative.

KREU XI DISPOZITAT E FUNDIT

Neni 36 Nxjerrja e akteve nënligjore

1. Ngarkohet Këshilli i Ministrave të nxjerrë aktet nënligjore në zbatim neneve 5, 16, 23, 24 të këtij ligji.
2. Ngarkohet ministri përgjegjës të nxjerrë aktet nënligjore në zbatim të neneve 2, 15, 19, 26 të këtij ligji.
3. Ngarkohen ministri dhe ministri përgjegjës për financat, të nxjerrë aktin nënligjore në zbatim të nenit 14 të këtij ligji.

Neni 37 Shfuqizimet

1. Kreu VIII dhe IX i ligjit nr. 9863, datë 28.1.2008 “Për ushqimin”, i ndryshur, shfuqizohen.
2. Shkronja “j”, e nenit 68 “Kundravajtjet administrative”, të ligjit nr. 9863, datë 28.1.2008 “Për ushqimin”, i ndryshur, shfuqizohet.

Neni 38 Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

**KRYETARI
GRAMOZ RUÇI**